



字觸 卷之三

櫟下老人 輯

青溪蘿隱 較

晰部

曰公子系十二

公孫述威震益都。夢有人語之曰。八歲子系。十二為期。覺謂其妻曰。雖貴而祚短。若何。妻對曰。朝聞道。夕死尚可。況十二乎。會有龍出其正殿。中夜有光耀。述以為符瑞。刻其掌文曰。公孫子。

遂自立爲天子。號成家。色尚白。建元曰龍興。元
年至十二年漢滅之。

人餉酪。魏武噉少許。蓋上題一合字。楊修便噉
曰。公教人噉一口也。修又嘗過曹娥碑。見碑陰
上題黃絹幼婦外孫齋。曰八字。魏武謂修曰。解
否。曰解。魏武曰。卿勿言。待吾思之。行三十里。乃
曰。吾已得。令修別記所知。修曰。黃絹。色絲也。於
字爲絕。幼婦。少女也。於字爲妙。外孫。女之子也。

於字爲好。齋。曰受辛之器也。於字爲辭。所謂絕
妙好辭也。魏武亦記之。與修同。歎曰。我才不及
卿。乃三十里。

活

楊德祖爲魏武主簿。時作相國門。始構榱桷。魏
武自出看。使人題門作活字。便去。楊見卽令壞
之。旣竟。曰。門中活。闕字。王正嫌門大也。

不

闕澤字德潤。拜侍中。初魏文帝卽位。權問羣臣

日曹丕以盛年卽位。恐孤不能及之。諸卿以爲何如。羣臣未對。澤曰。不及十年。丕其沒矣。大王勿憂也。權曰。何以知之。澤曰。以字言之。不十爲丕。此其數也。文帝果七年而崩。吳志

著乘履

南齊世祖夢著乘履。行太極殿上。庾温曰。履者運應木也。又乘字四十二點。世祖年過此卽帝位。

馬上郎

梁末有不見馬上郎之謠。及王僧辯滅。識者謂馬上郎王字也。南史

与上人

梁武帝除劉顯國子博士。時有沙門訟田。帝書曰。貞有司未辨。徧問莫知。顯曰。貞字文。爲与上人。帝因忌其能。出之。五代史

侯景

侯景嘗謂人曰。侯字人。邊作主。下作人。此明是人主也。臺城旣陷。梁武帝嘗語人曰。侯景必得

爲帝。但不久耳。破侯景字。成小人百日天子。爲帝當得百日。按景以辛未年十一月十九日篡位。壬申年三月十九日敗。得一百二十日。而景以三月一日便往姑孰。計在宮殿足滿百日。其言竟驗。南史

天保

齊文宣帝改年爲天保。士有深識者曰。天保之字。爲一大人只十。帝其不過十乎。北史

紫縊靴

齊武明太后不豫時。有惟得一量紫縊靴之謠。徐之才曰。紫之爲字。此下糸。縊者。熟當在四月之中。靴者。革傍化。寧是久物。至四月一日后果崩。北史

淵

煬帝會飲爲析字。令侍女杏孃析杏字。爲十八日。帝曰。能析朕字乎。杏孃曰。移左畫居右畫。豈不成淵字邪。遂成唐興之兆。南部烟花記

葉子

唐太宗問一行世數。禪師製葉子格進之。葉子言二十世李也。自高祖至哀帝共二十帝。

棗

開元末于弘農古函關得寶符。遂改元天寶。其符曰石赤文正成棗字。識者曰四十八也。及帝幸蜀之來歲正四十八年。開元傳信錄

柳光

太和中柳光入山崦中見石壁文字中有卯以附木小首元尾之語。卯附木柳字。小首元尾光

字也。宣室志

八人

翟天師名乾祐。峽中人。往往言將來事。常入夔州市大言曰。今夕當有八人過此。可善待之。人不之悟。其夜焚數百家。八人火字也。

廣明

唐僖宗改廣明元年。相字者曰。人自厓下出。姓黃氏。左足踏日。右足踏月。自此天下被擾。是年黃巢入長安。亂天下。隨筆云。廣明為唐去丑口。

而著黃家日月。以兆巢禍之亂。

木成文

梁開平二年。使其將李思安攻潞州。營于壺口。關伐木爲柵。破一大木。木中朱書隸文六字曰。天十四載石進。思安表上之。其羣臣皆賀。以爲十四年必有遠裔貢珍寶者。司天少監徐鴻謂所親曰。自古無一字爲年號者。上天符命。豈闕文乎。吾以爲丙申之年。當有石氏王此地者。蓋移四字中兩豎。置天字左右。卽丙字也。移四之

外圍。以十字貫之。卽申字也。後至丙申歲。晉高祖以石姓起并州。如鴻所言。稽神錄

太平

宋太宗改元太平。相者曰。太平二字。爲一人六十壽止此矣。太宗享年果應其言。

亨

熙寧末神宗改元。近臣擬豐亨進。上指亨字曰。爲子不成。可去亨而加元。遂以元豐紀年。塵史

靖康

宋欽宗改元靖康。術者曰：靖字當立十二個月。甫一年而北遷。

理宗

宋理宗未祔議諡。數易字。後定曰理。蓋以聖性崇尚理學。而天下道理最大。于是人無間言。而不知理字析之。取義乃四十一年王者之象。可謂請諡于天矣。度宗初議諡。或擬純字。則謂有屯之義。或擬正字。則有一止之嫌。遂定爲端文明武景孝皇帝。宋周密齊東野語

昌王

宋岐王始封昌王。時飛語云：昌字兩日並出也。裕陵惑之。以問大臣。大臣無能對者。呂申公知開封府。因上殿奏事罷。上從容曰：卿聞昌王之說乎。公曰：陛下何所疑。若聖意不能釋然。以臣所見。改封大國。則妄議息矣。裕陵意遂解。曲洧舊聞

順曦

方李順之亂。蜀有術士析順名曰：自一百八日

有西川耳。如期而敗。吳曦之亂。術士析曦字三十八日。我乃被戈。亦如期而誅。老學庵筆記

醋

宋忠定公蔡襄。出守泉州。以母命建萬安橋。公計海之深。踰千丈。築趾累石。無着力地。命吏爲文報海神。隸齋文。就肆痛飲。酣睡于涯。潮至期死耳。及醒。適潮退。起視之。則已易封矣。乃返而呈公。惟一醋字。翰墨如新。舉郡莫識。公夜卧展轉思之。方悟曰。神其令我二十一日酉時興工。

乎。至期潮果退。舍沙泥壅積者丈餘。潮之不至者。聯以八日。遂建此橋。

熊

紹興己酉。永嘉火災。前數日有熊自楠溪之江。游躍入小舟。渡至城下。初不懼人。命獵士殺之。時高開府世則寓城中。謂其倖。趙允蹈曰。熊于字爲能火。郡中宜懼火燭矣。不以爲然。已而延燒官民舍什七八。獨州治存焉。陶朱新錄

嘉泰

嘉泰元年辛酉三月二十八日火延燒御史臺
司農寺將作監進奏文思院太史局皇城司法
物庫及軍民五萬二千四百家綿亘三十里凡
四晝夜乃滅其時術者言年號嘉之文如三十
五萬口泰之文如三月二十八又都民市語多
舉紅藕二字藕有二十八絲紅者火也皆爲讖
云西湖志

臀无膚

宋胡易鑑能以易卦析字知吉凶于咸其輔頰

舌得癸丑狀元于臀无膚得丁未揆花蓋字文
臀卽展也臀諧其聲乃以无膚去肉爲殿頭之
祥而以卦爻第三知其名次此其析字法也

竒

艸木子賈似道有異志一術士能析字賈以策
畫地作竒字術曰相公之志不諧矣道立又不
可道可又不立賈默然求其罪而遣之恐泄其
事使人害諸途

桑相

元相哥丞相元名桑哥。拜相後，延術者書桑字令測。曰：今已作相，但欲知相位日月久近。曰：木字十八字也。上有三個十字，在相位當有四十八個月。桑哥不滿，遂更名相哥。復書相字令測。曰：目字橫看，又是四字。若是則橫直只四十八個月。至元辛卯正月敗，其言果驗。

豐 張乘槎事

劉命熙祖父居越有疾，劉在錢塘延槎，寫一豐字令占之。槎曰：死矣，尚何占焉。是晚訃音果至。

異日叩其故，槎曰：豐字之形，山者墓所也。二丰者，墓上木也。豆者祭器也。厥兆如此，庸非死乎。

德

劉常心有所欲占，延槎而不言其事，試令付之以驗其術。槎曰：書一字方可占。適有小學生在傍，正寫習千字文，至德建名立。劉就指德字令占之。槎曰：子欲占行人耳。劉曰：然何時當至。槎曰：自今十四日必來。劉曰：恐事未了，不肯來。槎曰：一心要來，後果如所占。劉問故，槎曰：德字雙

字解
立人乃行人耳。故知占行人。傷有十四字頭。故云十四日。下又一心字形。所以云一心要來也。

陋

柳道彥性迂緩而好思。嘗在旅舍。奴子盜其金。去資斧缺甚。乘欸段行。兀兀夢人畫陋字。視之。思陋傷抱耳。乃是人字。轉手入懷。物尚不失。行行忽見一肆所賣餅麩。因思餅麩者丙也。于陋字始全。其在是乎。下馬入其室。果得奴子。而金尚在懷。耳談

驗

大梁二岑馬公。為長山令。厚遇青衿王君。王成進士。馬里居。馬故清白吏。至不能舉火。王一夕夢人書驗字于手。覺而悟曰。其令吾念馬乎。乃遣人周旋。馬公不置。時論多之。顧曲亭紀聞

吉帖

神廟初。馬守愚來里中。不知何許人。工謝石之術。多奇中。有為人作蹇修者。以吉帖二字問馬。曰。此姻事已諧。以帖字巾傷。橫吉下。喜象也。然

諧後有憂。吉下口置巾上。宛然一吊字也。後果
然。

士

萬曆庚辰。董伯念偕其父上公車。問卜。龍曰。試
隨手拈一物來。適几上陳象棋。伯念取士字授
之。問伯念年幾何。曰庚申生。其人曰。足下今必
策名。名必在第十一。伯念詰之。其人曰。君庚申
生人也。年正二十有一。今徒步而來。其象爲之。
二十人着一之字。非進字乎。手拈士字。非進士

乎。士十一也。又棋以木成。足下生屬石榴木。木
數三八錯綜之。數十有一。故曰名在十一。其父
後至。亦拈士字問之。其人曰。賢子拈餘已落第。
二二木未字象也。公之發其癸未乎。已而果然。
字

有以字字問六甲。曰寅頭子尾。非寅日卽子日。
應在丑時。子寅之間也。是女。蓋字者。女子許嫁
曰字也。果以是日時生女。

玉缺

夢玉缺一點爲王。身卧下土上。病宜禳土。

樂

一人夢兩絲纏白木。占曰。兩絲纏白木。樂字。端可卜樂亦在其中矣。奚必饜梁肉。

欽

令君眷屬返里。行數日矣。書欽字視櫟公。俾決途中。公曰無恙。殆不成行。欽爲欠金。欠金者必還。語未終。蒼頭報前途寇阻。眷屬返矣。

天

某子病垂危。書天字視櫟公。公曰。工下之人不。斷嗣豈應絕。卒無恙。某諱有工字云。

好

陸君士冲病垂危。友人書好字視櫟公。公曰。但餘子女矣。奈何。卒不救。又

可

有書可字視櫟公者。公曰。男一丁。女一口。詢婚姻必矣。對曰。然。公曰。成則必成。但男族盛。有易視女姓之心。究且女爲男剋。以丁字太旺。口不

足以敵之也。數年後驗。

閨

閔君室人病。以閨字視櫟公。公曰。君閔姓。以玉
易文。是以素易采也。圭字去首。所謂閨中不全
也。且字有門內一土之象。恐無復可望矣。至維
揚卒。

黃

某令君以軍功被召入都。眾以兵垣期之。人以
黃字視櫟公。公曰。共由者道也。果補臺員。

初

楊左之厄。有書初字示櫟公者。公曰。刀劍之危。
及于衣冠之士。諸公不免矣。卒驗。

萱

有懷孕踰月。書萱字視櫟公。公曰。再遲廿一日
方生。蓋廿在頭。一字在日上。且下一字頗長。為
生字脚故也。時在五月廿日占。若依期則太遲
矣。其人猶豫。復曰。是男乎女乎。曰。女。蓋萱艸為
母。此女極易生長。他日必為人母。後果生一女。

時六月十一日。正廿一日也。

拆字之學。不始于謝石。元命包之土力于一。爲地。兩人交一爲水。八推十爲木。兩口啣士爲喜。說題辭之日生爲星。十夾一爲士。西合米爲粟。考異郵之蟲動几下爲風。春秋說之人十四心爲德。詩說之二在天上爲酉。風俗通云。丘之字二人立一上。一者地也。四方高中央下。象形也。孝經古契之卯金刀字。禾子說文之推一合十日士。以一貫三日王。又孔子曰。禾可爲酒。禾入

水也。以禾入水三字合而爲黍。中壘校尉之三田一土。阿瞞署令字之爲人一口。闕澤知曹丕之爲不一。孔融嘲氏儀之民無上。蜀趙直占牛角及口之爲公字。王恭之黃頭小人。郭之尸下至爲屋。蕭道成識曰。戊丁之人。與道俱晉。襄國謠古居左。月在右。讓去言。或入口。後石勒竟都焉。符堅左水右馬之爲馮。張亮知山上絲之爲幽州。梁武帝書貞字爲我與上人。貴耳集嘉泰之爲士大夫皆小人。有力者喜。又袁康吳平之

越紐錄。魏伯陽之參同契跋。孔北海之離合詩。陶隱居真誥之清靈真人詩。定錄中侯告。此類不縷舉。皆盲史氏止戈皿蟲二義。逗此一派耳。

字觸

卷之三終

字觸

卷之四

樂下老人 輯

青溪蘿隱 較

幾部

王字

漢高祖始為亭長。夢逐一羊。拔角尾皆落。占曰。羊無角尾。王字也。果為漢王。而王天下。

夢殿得禾

蔡茂。初在廣漢。夢坐太極殿上。有三穗禾。茂跳

取之得其中穗輒復失之以問郭賀賀離席慶
曰大殿者宮府之形象也極而有禾人臣之上
祿也取其中穗是中台之位也于字禾失爲秩
雖曰失之乃所以得秩也旬月而茂徵焉乃辟
賀爲掾後漢

牛頭

蔣琬見推之後夜夢有一牛頭在門前流血滂
沱意甚惡之呼問占夢趙直直曰夫見血者事
分明也牛角及鼻公字之象君位必當至公大

吉之徵也後琬官終大司馬

蜀志

桑

何祗字君肅嘗夢井中生桑以問占夢趙直直
曰桑非井中之物會當移植然桑字四十下八
君壽恐不過此祗笑言得此足矣卒如所言

蜀志

昱

魏程昱本名立少時夢上天兩手捧日太祖曰
卿當爲吾腹心乃于立上加日而爲昱

點額

吳主孫權嘗夢北面頓首于天帝忽見一人以筆點其額舉以問徵士熊循循曰吉祥矣大王必為主王者人之首額者王之上王上加點主字之象也。吳祚國統

夢頭生角

諸葛亮出北谷口魏延爲前鋒延夢頭生角以問占夢趙直直詐曰麒麟有角而不用此不戰而自附之象退而告人曰角之爲字刀下用也頭上用刀其凶甚矣果爲楊儀所殺

十八公

丁固夢松生于腹上松字十八公後十八年爲公

擲玉于門

李盛作安南太守夢人擲玉于門盛曰門加玉閏字也必有榮閏果暴富貴。玉箱雜記

宋桶

宋桶夢內中有一人著赤衣桶一手把兩杖極打之索統占曰內中有人是肉字也兩杖者著

之象極打者飽肉食也三日過三家皆得肉食
劉彥明燉煌錄

走馬上山

郡主簿張宅夢走馬上山還繞舍二周但見松柏不知門處索統占曰馬屬火火禍也人上山爲凶字但見松柏墓門象也不知門處無門也三周三朞也後三年必有大禍宅果以謀反伏誅

脚

功曹張邈奉使詣州夢狼噉一脚令索叔徹詳之索曰脚肉被噉爲却字會東兵反遂不行

髟

黃平夢書一髮字書髟而止索統曰此亡友也是日果有友人訃至

潛居錄

車傍斤

揚雄爲春陵令舉兵拒王敦城陷爲敦所擒初雄被執之日其夜夢乘車挂肉其傍占曰夫肉必有筋筋斤也車傍于斤吾其戮乎尋爲敦所

害。晉書

乘龍

郭瑀與敦煌索暲起兵。運粟以應王穆。後穆聽
讒。將害索暲。瑀諫不從。出城大哭。舉手謝城曰。
吾不復見汝矣。遂輿疾而歸。旦夕祈死。夜夢乘
龍至屋而止。寤而歎曰。龍飛在天。今止于屋。屋
之為字。尸下至也。龍飛至尸。吾其死乎。古之君
子。不卒于內寢。于是還酒泉南山赤崖閣。飲氣
而死。

羊魚

趙主石季龍嘗晝寢。夢見羣羊負魚。從東北來。
寤以訪佛圖澄。澄曰。不祥也。鮮卑其有中原乎。
蓋以羊與魚為鮮字也。後果為慕容儁所殺。

大亨

桓元初改元為大亨。遐邇讙言曰。二月了。故義
謀以仲春發也。元篡立。又改年為建始。以與趙
王倫同。又易為永始。復是王莽受封之年。晉書

袞衣倚槐

王克淵北討諸葛榮。夜夢袞衣倚槐而立。以爲吉。問于楊元慎。曰：三公之兆也。退告人曰：槐字木傍。鬼亡後得三公耳。果爲爾朱榮所殺。追贈司空。

天正

梁武陵王紀僭卽帝位。建元曰天正。永豐侯蕭撝曰：王不克矣。昔桓元年號大亨。有識者以爲二月了。而元之敗實在仲春。今日天正。正之爲文一止。其能久乎。果一年而敗。

主

高洋封齊王。夢人以筆點已額。以告王曇哲曰：吾其退乎。哲拜賀曰：王上加點。主字。後受魏禪。

隆化

武平七年。後主爲周師所敗。走至鄴。自稱太上皇。傳位于太子恒。改元隆化。時人離合其字曰：降死。竟降周而死。

宣政

周武帝改元爲宣政。梁主蕭歸離合其字曰：宇

文亡日其年六月帝崩

天子冢

周宣帝在東宮時不修法度武帝數撻之及嗣位摸其痕而大罵曰死晚也是年又改元爲大象蕭歸又離合其字曰天子冢明年帝崩

廣運

開皇初梁王蕭琮改元爲廣運江陵父老相謂曰運之爲字軍走也吾君當爲軍所走乎其後琮朝京師被畱不反其叔父嚴掠居人以叛梁

國遂廢

大業

隋煬帝號年曰大業識者惡之曰於字離合爲大苦尋而喪亂率土遭荼炭之酷焉

改國字

天授中則天好改新字又多忌諱有幽州人上書云國字中或或亂大象請口中安武以鎮之則天大喜下制卽依月餘有上封者云武退在口中與囚字無異不祥之甚則天愕然遽追制

改作罔。後孝和卽位。果幽則天于上陽宮。

朝野僉載

幽州

幽州刺史張亮。初有薛琬夢亮于山上掛絲。覺而告亮曰。山上絲。幽字。君為幽州乎。明日果授幽。

講坐下聽法

中書令崔湜。與尚書右丞盧藏用。坐太平黨。同被流嶺南。俱行。湜謂藏用曰。家弟承恩。或冀寬宥。因遲留不速。進行至荊州。夢于講堂照鏡。曰

鏡者明象。吾當為人主所明也。以告占夢人張猷。對曰。講堂者受法之所。鏡者于文為立。見金。此非吉徵。其日追使至。縊于驛中。舊唐書

按朝野僉載。又云。張猷謂盧曰。坐下聽講。法從上來也。鏡字。金榜竟也。其竟于今日乎。然總一意。

失

洛州杜元。有牛一頭。元甚憐之。夜夢見其牛有兩尾。以問占者李仙藥。曰。牛字有兩尾。失字也。

經數日果失之。朝野僉載

四者

豆盧署本名輔真。郡守鄭式瞻甚禮之。嘗謂署曰。子覆姓不宜雙名。將爲改之。因書著助署字。使自擇之。其夕宿于館。夢一老人謂曰。聞使君與子更名。子當四舉成名。四者甚佳。後二十年爲此郡守。因指郡隙地曰。此地可以建亭臺。旣悟思之。四者署字也。遂以爲名。旣二年又下第。以爲夢無徵。後二年果登第。蓋自更名後。四舉

也。後果爲衢州刺史。周覽境內。得夢中所指隙地。遂命建一亭曰徵夢亭。前定錄

呂走人向主

開元中前進士張佐。遇老父于樛社。自稱吾字文周。時居岐。扶風人。姓申名宗。十八從蕪公于謹。征梁元帝于荊州。夜夢青衣人謂予曰。呂走天年人向主。壽百千。吾乃詣占夢者于江陵市。占夢者謂予曰。呂走。廻字也。人向主。住字也。豈子住乃壽邪。吾遂陳情于校尉拓跋烈。許之。唐

孫願申宗傳

門耳

魏仍將赴選。祈夢。夢見侍郎李延年。使人喚仍于銓門中。側耳聽之。明日解者云。門中側耳是聞字。已而果得聞喜。

河

宋主有疾。夢河中無水。以為不祥。占者曰。河無水。乃可字。主君疾當瘳也。果愈。

片犬

梁灝進選前十日。夢人賜犬肉一片。灝不悅。以問術者。曰。狀字也。果為狀元。

八

王元規慶曆末。將赴吏部選。一夕夢一人衣冠高古。若術士者。因訪以當授何地。官職早晚。其人書八字與之云。時生一陽。體合三水。既覺。莫曉其意。及注官。果授河南府河清縣主簿。凡三字從水。到官日正冬至。

竹束

葉祖洽赴省試。夢惠應王指殿下竹一束示之。前此條對惟以賦。及祖洽入試始用策。蓋竹一束策字也。其年葉遂得大魁。

入香州

弓輿不得

弓輿潭州人。乾道四年冬。偕鄉里六七人赴省試。過宜春。謁仰山祠。祈夢。夢至官府。見柱揭紙。

一片書。弓輿不得四字。但不字稍聯接上下。而中乃空。既覺殊不樂。自謂必下第。及入試。輿中選同祈夢者盡黜。始以語人。謂夢不驗。好事者曰。不字斷乃一个也。神言弓輿一个得耳。

黑犬

宋徐元杰嘗夢神人繫二黑犬過堂下授之。是歲登科之文有默思默通云者。主司見之以爲神語。乃悟默字有黑犬重複用之。二黑犬之徵也。靈應至此。豈術相所窺。

一犬

陳炳嘗夢其孫師道與一犬立圓板上。覺而不省。乃詢于杜庶。庶曰：犬立板上者，乃犬傍有板也。圓板一片也。片加犬，乃狀字也。而且圓，孫其作狀頭乎。炳悟而喜。咸淳中，師道果狀元及第。歷官參知政事。

羊去角尾

耶律乙辛母方娠，夜夢手搏殺羊，拔其角尾。既寐，占之術者曰：吉兆也。羊去角尾為王字。汝後

有子當王。後生乙辛，果位至北院樞密使。出知

南院大王事。遼史

顯

洪武十八年乙丑廷試。先一日高皇帝夢殿前一巨釘綴白絲數縷，悠揚日下。及折首卷，乃花綸。上以年少抑之，已而得丁顯卷，姓名與夢符。且顯字日下雙絲也。遂擢狀元。

狀

諱信字誠甫，浙江定海人。洪武二十七年甲

張

戊廷試第一。領鄉薦赴京。夢以竹片反押青犬。頭置兀上。解者曰。竹片反押青犬。乃狀字。置兀上。湊元字。况當甲戌。必魁天下。果如其言。

頭生羊角

解學士縉。會試時。有廬陵舉人沈舉。發解南省。居首。及將廷試。忽夢頭上生羊角。同年曰。頭角崢嶸。在此舉矣。傍一人曰。非也。羊角乃解字也。恐有解姓者。復居首耶。迨傳臚果得解縉也。

蟹

一。士人赴省應試。夢得蟹而去其足。以問占者。曰。蟹去足。乃解字也。當為解元。及榜出。果然第一。

片犬

林諱環。字崇璧。福建莆田人。永樂四年丙戌廷試第一。環將試。春闈夢友李文淵送犬肉一片。環彎一臂受之。蓋片犬乃狀字。彎一臂類元字。後官文淵閣學士。始悟李文淵乃先兆。又往九仙觀卜兆。路遇道士云。為代占夢。赤犬化為龍。

明年應作狀元也。乃詭說之詞。及赴試。適符給語云。

况

盤門伍相神。舊本立像。况守至。見之曰。是何褻也。爲易坐像。旣而毀舊像。中有一石刻字云。若要子胥坐。除非二兄過。數之前定如此。

眉公見聞錄

干

徐溥謁范文正公廟。少憩假寐。忽夢一人朱冠來曰。君壽還有兩干。覺而思之。以爲二十年也。

其後二十二年卒。蓋干字兩十。兩一合爲二十二云。

司

福州林廷樾未第時。往仙祠丐夢。見一牌扁上半大書一司字。半空白無字。圓者曰。公異日位至大司空。後果然。

鄭啓莫言

鄭生名啓。求夢仙祠。夢仙人謂今年解元。鄭啓莫言。鄭得夢。以發解自負。謂仙人命已勿露耳。

既揭曉榜首乃鄭啓謨始知莫言之義

田田田土

莆蘇璞祈功名于鯉湖仙廟夢仙人語曰田田田土立月已三覺不知所謂後科場畢見主人亭窗上書壘龍二字方悟前夢今決中矣及揭曉果有名

二十鬼

興化郡丞朱士容婦有娠以子女求夢于仙夢人以科舉榜相視惟一魁字後生男名魁兒謂

必驗之乃年二十得危病自曰魁字二十鬼也

吾其休矣果卒耳談

亞

一士應舉求夢于墳夢公使卒縛之曰惡人也去其心士悸而醒以為不祥尋中式見扁額亞魁字始悟惡字去心為亞也

又

一士應試夢人以粉書大十字于門以為不祥尋中亞魁亞字中白十字也

牛田

吳生某求科名于仙廟。夢一人示以牛田二字。已而兩科不第。乃更以是夢質之仙人。又夢仙人云。何不加田于牛之上。至嘉靖甲午科始發。

婦

莆有某往鯉湖卜其女婚事。何日配合。夢仙人書一婦字。醒不知謂何。圓者曰。女旁有山下。乃出字。君之女當出橫山耳。後女果適惟新里橫山地方。

戊

士求夢九鯉湖夢神以戊字示之。以爲逢戊可捷。旣而不驗。識者曰。戊字逢丁而成。子其捷于丁歲乎。果驗。九鯉湖誌

孫

胡翰林休復

胤嘉

丙午北遊太學會嘉興陳生

曉先天數。胡命發策。其數云。祝融歲首。子系入場。煥乎鸞鳳之文章。胡未解。入京往西山中。八月四日。始移寓棘闈之左。胡問主人何姓。曰。姓

孫竊喜以爲數之奇合。是歲果預薦。

亞卿

長興某公生子時。夢郡公送亞卿棹楔至其家。比長始穎慧。領賢書之夕。復夢亞卿二字。凡上春宮者。屢亦屢夢。夢輒如前。數不第。以前夢有待。未肯謁選也。年已六十始詣吏部。授邑令。得西鄉縣焉。蓋西鄉之與亞卿字相類也。神之巧弄如此。

巳酉

少司馬張公元佐。巳酉舉于鄉。數上南宮不第。夢人曰。更巳酉成進士矣。公意春闈安得巳酉。或終于此耳。乙丑中庸題爲高明配天。題紙配字偶破碎。巳酉二字也。果于是歲成進士云。顧

曲亭紀聞

來

一婦居室。夫久客未還。一夕婦夢巨木兩人夾之。卜者曰。兩人夾木。非來字乎。汝婿目下當歸。已而果然。

人木

昔一仕宦連夕夢站在木邊術士占之曰人傍木休字也不久果罷職

泣

一人夢蒹笠風吹溪邊占者曰笠飄水畔泣字無疑果有父母喪亡之變

皮石

一人夢靴匠倚石不知何意占者曰靴匠乃皮上也皮傍石破字也不久家破蕭條人口零散

榮

一卜夢一樹端兩焰竝發占者曰木兩火榮耀之光果得登第

竄

有一吏人迫于官訟禱夢于神夢鼠頭戴笠既寤不解因而再寤夢神示曰汝可質之某狀元會有同祈夢者本以功名事來禱竟無夢吏故不知其人之姓偶以夢中始末語之其人特異之乃剖示曰鼠頭戴笠竄字也亟走匿爲是某

狀元。卽指是人也。後果大魁。

白

日一角。白字也。角者冠翅也。文人夢之。白屋書生。頭角崢嶸之象。

玉

土山橫一劍。玉字也。夢者佩玉之兆也。女人夢之。主產大貴之子。

鰈

一人幼時。常夢沼中四魚。占者曰。一水四魚。鰈

字也。是人至老孤獨。

失

一人夢騎牛背。占曰。人在牛背。失字也。果遭失脫之憂。

獄

一人夢一人言一犬吠。術士曰。人言犬吠。乃獄字也。果遭獄囚之繫。

斗門

一人夢一斗入門。占曰。一斗入門。闡也。是日果

有聞殿之恐。

字觸

卷之四終

字觸

卷之五

櫟下老人

輯

屯溪螺隱

較

諧部

東方朔

漢武帝嘗以隱語召東方朔。時上林獻棗。帝以杖擊未央前殿檻。曰叱叱。先生束束。朔至曰。上林獻棗四十九枚乎。朔見上以杖擊檻為兩木。兩木林也。束束棗也。叱叱四十九也。本傳

薛綜

蜀使張奉于孫權前。嘲尚書闕澤姓名。澤不能答。薛綜下行酒。因曰。蜀者何也。有犬曰獨。無犬為蜀。橫目苟身。虫入其腹。奉曰。不當復列君吳邪。綜應聲曰。無口為天。有口為吳。君臨萬邦。天子之都。奉無以對。啓顏錄

氏

是儀字子羽。北海營陵人。本姓氏。初為縣吏。後仕郡。郡相孔融嘲儀言。氏字民無上。可改為是。

乃遂改焉。

吳志

鳳

嵇康與呂安善。每一相思。千里命駕。安復來。值康不在。喜出戶延之。不入。題門上作鳳字而去。喜不覺。猶以為欣。離視鳳字。凡鳥也。世說

井字

鮑照井字謎曰。一八五八。飛泉仰流。仰流者。垂綆取水而上之。故曰仰流也。一八者。井字八角也。五八折井字而四之。則其為十者四也。四十

卽五八也。又四十八箇頭。

崔光

後魏高祖名子曰。恂。愉。悅。懌。崔光名子曰。勵。勗。勉。高祖謂光曰。我兒名傍皆有心。卿兒名傍皆有力。答曰。君子勞心。小人勞力。上大悅。談藪

習字

後魏孝文帝嘗宴羣臣。酒酣。因舉卮酒屬羣臣曰。三三橫。兩兩縱。誰能解之。賜金鍾。御史中丞李彪曰。沽酒老嫗甕。注鉅屠兒割肉與稱同。尚

書左丞甄琛曰。吳人浮水。自云工技兒。擲油在虛空。彭城王勰曰。臣始解此是習字。帝卽以金鍾賜彪。伽藍記

徐之才

北齊徐之才。聰辨有兼人之敏。尤好劇談。會聚多相嘲戲。常嘲王昕。姓云。有言則証。近犬則狂。加頸足而為馬。施角尾而為羊。昕無以對。又嘗宴客。盧元明在坐。元明因戲之才云。卿姓徐。字是未入人。徐卽答曰。卿姓在亡為虐。在丘為虛。

生男則成。配馬則成驢。又嘲元明二字云。去頭則爲元明。出頸則爲无明。減半則爲無目。變聲則爲元旨。亦無以對。啓顏錄

松槐矯對

賈嘉隱七歲以神童召見。李勣於朝堂戲曰。吾所依何樹。嘉隱曰。松樹。李曰。此槐樹也。何言松。嘉隱曰。以公配木。得非松。長孫無忌復問。吾所倚何樹。曰。槐樹。曰。汝不能矯邪。隱曰。何須矯對。但取其鬼木耳。李曰。小兒作獠面。何得如此聰。

明隱曰。胡頭尚作宰相。獠面何廢聰明。李狀胡也。語林

狄仁傑

狄官侍郎。狄仁傑戲同官郎盧獻曰。足下配馬。乃作驢。獻曰。中劈明公。乃成二犬。傑曰。狄字犬。傍火也。獻曰。犬傍有火。乃是煮熟狗。朝野僉載

尹字

京兆尹訪蘇環。既去。環令男頰咏尹字。乃咏曰。丑雖有足。甲不成身。見君無口。知伊少人。

孚

賀知章祕書監有高名。告老歸吳中。上嘉重之。每別優異焉。知章將行。涕泣辭上。上曰。何所欲。知章曰。有男未有定名。幸陛下賜之。歸爲鄉里。榮。上曰。爲道之要莫若信。孚者信也。履信思乎。順。卿子必信順之人也。宜名之曰孚。知章再拜而受命。久而謂人曰。上何謔我邪。吳人謂孚乃爪下子。豈非呼我爲瓜子邪。

斧

杜甫子宗武。以詩示阮兵曹。兵曹答以石斧一具。隨使并書還之。宗武曰。斧。父斤也。兵曹使我呈父。加斤削也。俄而阮聞之曰。誤矣。欲子斫斷其手。此手若存。天下詩名。又在杜家矣。文覽

甘洽

唐甘洽與王仙客友善。因以姓相嘲。洽曰。王計爾應姓田。爲你面潑賴。抽卻你兩邊。仙客應聲曰。甘計你應姓丹。爲你頭不曲。迴脚向上安。啓

顏錄

青龍寺客

乾符末。有客於青龍寺訪知事僧。屬其匆遽。不暇畱連。翌日至。又遇要地朝客。後時復來。亦阻他事。頗有怒色。題其門而去。曰。龕龍去東海。時日隱西斜。敬文今不在。碎石入流砂。僧皆不解。有沙彌曰。龕龍去。有合字存焉。時日隱。有寺字存焉。敬文不在。有苟存焉。碎石入砂。有卒存焉。此不遜之言。辱我曹矣。桂苑叢談

午

李安義者。謁富人鄭生。辭以出。安義於門上大書午字而去。或問其故。答曰。牛不出頭耳。此之書午。與題鳳字正堪作對。

薛濤

薛濤辨慧。有黎州刺史作千字文。令帶魚禽鳥獸。乃曰。有虞陶唐。濤曰。佐時阿衡。其人謂語中無魚鳥。行罰。濤曰。衡字內有小魚字。使君有虞陶唐。都無一魚。坐客大笑。又高駢鎮成都。命濤爲一字令。曰。須得一字相形。又須逐韻。高曰。口。

有似沒梁斗。濤曰川。有似三條椽。節度曰如何。一條曲。濤曰相公爲西川節度使。尚使一沒梁斗。至於窮酒佐。三條椽內一條曲。又何足怪。

郭忠恕

郭忠恕嘲司業聶崇義云。近貴全爲曠。攀龍只是聾。雖然三箇耳。其奈不成聰。聶應聲曰。莫笑有三耳。何如蓄二心。

波滑

荆公字說。波乃水之皮。東坡曰。然則滑乃水之

骨乎。

日

王荆公戲作謎語。畫時圓。寫時方。冬時短。夏時長。吉甫解云。東海有一魚。無頭又無尾。夏除脊梁骨。便是兩箇謎。

賀資

荆公字謎。目字加兩點。不作貝字猜。貝字欠兩點。不作貝字猜。錢氏私志

圖字

荆公字謎四箇口。盡皆方。十字在中央。不得作田字道。不得作器字商。錢氏私志

劉攽

劉攽與王安石最爲故舊。王戲拆劉名曰劉攽。不直分文。劉亦拆王名曰失女便成宥。無心真是妒。下交亂真如上頭悞。當宁王大慙。又劉攽嘲王覲云。汝何故見賣。王曰賣汝直甚分文。

篤鳩

東坡聞荆公字說新成。戲曰以竹鞭馬爲篤。以

竹鞭犬爲何可笑。荆公嘗曰鳩字以九以鳥亦有徵據否。東坡曰詩云鳩鳩在桑。其子七兮。和爹和孃。不是九箇。

陳亞

陳亞自爲亞字謎曰。若教有口便啞。且要無心爲惡。中間全沒肝腸。外面任生稜角。

陳亞蔡襄

陳少卿亞維揚人。善詩滑稽尤甚。嘗與蔡君謨會於僧舍。君謨題詩屏間曰。陳亞有心終是惡。

亞卽索筆對曰。蔡襄無口便成衰。

呂擴謝暉

呂擴謝暉亦以名相嘲。謝曰。無才終入廣。呂云。不日便充軍。二人因而成隙。

韓玉汝

韓莊敏公纘求字於歐陽文忠公。公以小合幅紙書玉女二字送去。莊敏不樂。明日相見。猶有愠色。文忠公曰。出處無點水也。君何怪耶。取筆添女三點水。相與一笑。蓋詩中玉女。但音作汝。

也。前輩亦雅戲若此。桐陰舊話

晶飯毳飯

東坡嘗與劉貢父言某與舍弟習制科時。日享三白。食之甚美。不復信世間有八珍也。貢父問三白之說。坡言是一撮鹽。一碟生蘿蔔。一盃飯。貢父大笑。久之以簡招坡喫晶飯。坡一笑。復省憶謂人曰。貢父讀書多。必有出處。比至赴食。見案上所設。惟蘆菔鹽飯而已。始悟貢父以三白相戲。援箸食之。幾盡。將上馬云。明日可見過。當

具毳飯奉待。貢父亦知其爲戲。但不解毳飯所設何物。迨往談論過半午。不設食。貢父飢甚。索飯。坡云。少待。如此再三。彼答如故。貢父曰。飢不可忍矣。坡徐曰。鹽也。毛。蘆菹也。毛。飯也。毛。非毳而何。貢父捧腹曰。固知君必報東門之役。狀慮不及此。坡始命進饌。抵暮而去。何氏語林

黃魯直

黃魯直劉莘老同在館中。魯直頗治珍味。劉北人性朴厚。常云。來日喫蒸餅。鄉音頗質。一日聚飲行令。以三字離合成字。一人曰。戊丁成皿盛。王曰。王白珀石碧。或云。里予野土墅。黃云。禾女委鬼魏。劉未答。黃遽云。僕當奉代。以來力勅。正整如何。其聲大似喫蒸餅之語。坐皆笑。

圈圍估

崇寧間。上問蔡京居杭。識推官吳侗乎。今以大。臣薦欲除官。京素恨侗。對曰。識之。其人傲狠無。上上驚曰。何也。曰。吳知陛下御諱。而不肯改。乃。以一圈圍之。上默然不懌。未幾。言者承風旨。論。

罷按哲宗名佶故云。

王邁劉克莊

王曜軒邁嘗調劉後邨克莊云。十兄二十年前何其壯。二十年後何其不壯。劉答之曰。二兄二十年前何其遇。二十年後何其不遇。齊東野語

用

一月復一月。兩月共半邊。一山又一山。三山皆倒懸。上有可耕之田。下有長流之川。六口共一室。兩口不團圓。齊東野語

儉

世俗善謔者多拆字為謎。然多無文理。不足稱說。曩同僚坐間舉儉字謎。一人立。三人坐。兩人小。一人大。其中更有一二口。教我如何過。其意甚明白。真善謔而有益者。豈特可助談話而已。故筆之。宋費補之梁溪漫志

楊東里

楊東里集有人從門內閃。公向水邊浚之句。前人集中如此類甚多。不能備載。

馬王

馬王二人嘗聚宴談笑。馬遂嘲王曰：王元本姓二。爲你漫走來。將丁釘你鼻。王曰：馬元本姓匡。添你尾子來。背上負王郎。

啓顏錄

璋蘇

姑蘇李璋敏於戲調。偶赴鄰人席。主人者雖富而素鄙。會次適李旁。旣進食。璋視主人之前鮭魚大。璋卽謂主人曰：璋與若蘇人也。每見人書蘇字不同。不知魚在左邊是在右邊。是主人曰：

古人作字不拘一體。從便移易耳。璋引手取主人之魚示衆曰：領主人指揮。今日左邊之魚亦合從便。權移過右邊。一座輟飯而笑。

張乂

張乂延平人。少負才。入太學有聲。其人眇小而好作爲。同舍多不平之。莆田林叔弓以其名字作詩賦各一首嘲之。賦有云：身材短小。欠曹交六尺之長。腹內空虛。乏劉乂一點之墨。詩有云：身分交兩段。風使十橫斜。文上原無分。人前強

出些形容甚妙。

巧對

舊傳聯句。如海晏河清。王有四方當作國。天寒地凍。水無一點不成冰。笑指深林。一犬低眠竹下。閑看幽戶。孤木獨立門中。八刀分米粉。千里重金鍾。皆天然巧合。饒有思致。

聶

聶大年眇一目。聘至京。有欲識之者。童大章曰。何必識其人。彼但多一耳。少一目而已。

傘爽

岳公正與夏公頃飲。出酒令一字。內有大人小人。復以諺語二句證之。曰傘字有五人。下列衆人。上侍一大人。所謂有福之人人服事。無福之人服事人。夏云爽字有五人。旁列衆小人中。藏一大人。所謂人前莫說人長短。始信人中更有人。畜德錄

陳祭酒

雲間陳祭酒詢。每酒酣耳熱。有不平事。及人有

過輒面發之。在翰林時忤一權貴，出爲州同。同僚祖行，有倡酒令，各用二字，分韻相協，以詩書一句結之。陳學士循云：轟字三個車。余斗字成斜。車車車，遠上寒山石徑斜。高學士穀云：品字三個口。水酉字成酒。口口口，勸君更盡一杯酒。又一人云：犇字三個牛。田壽字成疇。牛牛牛，將有事乎田疇。陳云：轟字三個直。黑出字成黠。直直直，焉往而不三黜。合席大笑。

唐殿元對

唐臯以翰林使朝鮮，其主出對曰：琴瑟琵琶八大王。一般頭面，臯卽對曰：魑魅魍魎四小鬼。各自肝腸，主大駭服。

沈石田

沈石田文衡山陳白陽王雅宜遊飲虎丘，人石上。時中秋月色大佳，石田行令云：取上一字，下拆兩字，字義相協。倡云：山上有明光，不知是日光。月光文云：堂上掛珠簾，不知是王家簾。朱家簾。陳云：有客到館驛，不知官人舍人。王云：半

夜生孩兒不知是子時亥時各賞大觥

金元賓

金元賓善談諧一日在文衡山內翰座浪謔訓蒙師潘某潘慍曰吾有一對爾能對甘受爾侮金問之曰王大夫昆季築墻一土蔽三人之體金應聲曰潘先生父子沐髮番水灌兩牛之頭

王文恪

文恪公六七歲時附學於舅氏一小女使送茶王戲以手握其手舅氏出一對與對曰如手爲

拏此後莫拏奴手王對曰人言是信從今毋信人言

李西涯

焦閣老芳面黑而長如驢嘗謂西崖曰君善相煩一看李久之乃曰左相像馬尚書右相像盧侍郎必至此地位馬與盧合乃一驢字始知其戲

諸理齋

鳳林夏五名景倩延師周四維訓子以不稱欲

再延妻曰。何爲又增人口。夫不從。又延羅成吾。時諸理齋亦館於夏。戲曰。夏五本是五。增口便成吾。四維尚未去。如何又請羅。

闌玻

楊孟平。四明人。居金陵。最善戲。能篆書。有靴匠號東門王皮者。驟富作一室。以延賓。求扁于孟平。孟平篆闌玻二字與之。或詰之。孟平曰。加一畫。卽東門王皮也。

一極

東筦方彥卿俊。善戲謔。又善拆字作謎。如上不在上。下不在下。不可在上。且宜在下。謂一字也。木了又一口。非杏亦非呆。勿作杳字說。勿作困字猜。謂極字也。雙槐歲抄

杜渭

蜀人杜渭。江朝紳。令麻城。居官執法。不敢干以私。一日宴鄉紳。梅西野倡令。要拆字入俗語二句。梅云。单奚也是奚。加點也是溪。除却溪邊點。加鳥却爲鷄。俗語云。得志猫兒雄似虎。敗翎鸚

字解
三
鵝不如鷄。毛石崖云。單青也是青。加點也是清。除却青邊點。加心却是情。俗語云。火燒紙馬舖。落得做人情。杜荅云。單相也是相。加點也是湘。除却湘邊點。加雨便爲霜。俗語云。各人自掃門前雪。莫管他家瓦上霜。又云。單其也是其。加點也是淇。除却淇邊點。加欠便爲欺。俗語云。龍遊淺水遭蝦戲。虎落平洋被犬欺。

錢兼山郭劍泉

蘇州錢兼山郭劍泉二宦。初甚相善。晚以小嫌

成訟。袁節推斷之。未服。某宦置酒解和。并邀袁公。郭爲令曰。良字本是良。加米也是糧。除却糧邊米。加女便爲娘。語云。買田不買糧。嫁女不嫁娘。蓋有所刺也。錢曰。其字本是其。加水也是淇。除却淇邊水。加欠便成欺。語云。馬善被人騎。人善被人欺。袁曰。禾字本是禾。加口也是和。除却和邊口。加斗便成科。語云。官無悔筆。罪不重科。某宦執酒勸曰。工字本是工。加力也是功。除却功邊加。加糸便成紉。語云。人無千日好。花無百

日紅

招客

古人詩格有遣書招客云板戶公堂斫脚露喪
荅云班犬良賦趨龜空肚板戶木門閑字公堂
官舍館字斫脚斬足斲字露喪尸出屈字謂閑
館斲屈也班犬文苟敬字良賦尚田當字趨龜
走卜赴字空肚欠食飲字謂敬當赴飲也

門

倚闌干東君去也霎時間紅日西沈鐙閃閃人

兒不見悶淹淹少个知心

寒則重重叠叠熱則四散分流四个在縣三个
在州村裏只在村裏市頭只在市頭

婦

左七右七橫山倒出

硯蓋

研猶有石峴更無山姜女既去孟子不還
東坡集

他

問管仲。

佯

何可廢也。以羊易之。

秦

二畫大。二畫小。

樓

長十八。短八十。八个女兒下面立。

卜

上又無畫。下又無畫。

入

兩下裏做人難。

孕

先寫了一撇。後寫了一畫。

田

四山縱橫。兩日綢繆。富是他起脚。累是他起頭。

呆

出自幽谷。遷于喬木。

脚

月字去了一直。

觚不觚觚哉觚哉

四个角。四个爪。頸上一个安得巧。两个尾巴象者少。似老非老。似考非考。似弋非弋。似找非找。以上並田水月。

按徐文長作畫。類題作田水月。

又有一謎云。卓文君空幃獨守。遇相如琴瑟。偕偶。趙朔兒著意移花。牧犢子多情插柳。

王曰叟

兩山相背。兩山相對。兩山相對不相連。一枝文

筆插中間。丘毛伯

虫二

近有為燈謎者。書虫二兩字。謂無邊風月也。亦佳。顧曲亭紀聞

月

肩上有。背上有。胸上有。腿上有。脚上都有。頭上無。面上無。耳上目上無。手上指上俱無。

彭

好面花腔鼓皮破難修補。拿住一個彪。走了一個虎。

湯

曾點成湯

賞

生員與和尚角口。和尚不成和尚。生員不成生員。

秦字詩

大宗伯于公慎行夫人秦氏賢而能文詞。又有

二妾亦慧。王對南作秦字詩以嘲之曰。一大能將二小容。三人齊把小于攻。若把小于攻去了。三人無日不春風。
出耳談

沈筠溪

歸安沈筠溪。弱冠補博士弟子。與其弟偕之城。時風雨暴作。過陳方伯兄弟邸。方伯戲曰。大雨沉沉。二沈伸頭不出。公應聲曰。狂風陣陣。兩陳搖擺不開。可稱巧絕。

蔣濤

蘇郡蔣濤工于對。如凍雨洒窓。東兩點。西三點。切糕分客。上七刀。下八刀。真絕對也。

棗棘

又一對。棗棘爲薪。截斷劈開。成四束。閭門起屋。移多補少。作雙間。甚有作意。

十干名

顛倒不自由。憑空下玉鈎。兩人却把一人休。可
意人兒心不應口。要成就。怎能勾。已不的一點
上心頭。向平康將八字推求。辜恩負義。露尾藏

頭任人丟。一發把弓鞋撇却無心繡。

田

四山相對頂相連。橫也川。豎也川。團團一家共
十口。只有四口不周全。

肅

左一片。右一片。橫帶着方巾。頂上插枝箭。

巧對

巧對頗有可傳者。但妄指某人誣矣。皆去姓氏。
存一二于後。○鴻是江邊鳥。蚕爲天下虫。○議

論吞天口。功名志士心。○人曾爲僧。人弗可以
爲佛。女卑爲婢。女又可以爲奴。○星爲夜象。却
從日下而生。花本木形。何自草頭而化。○硯自
石邊見口。笙從竹下生聲。○八人共擁爐中火。
十口同耕郭外田。

字觸

卷之五終

字觸

卷之六

樂下老人 輯

青溪蘿隱 較

說部

董彥遠

董彥遠除正字謝啓。其略云。殘經不悟于郭亡。
闕文徒存于夏有。馬不足一者。旣失其全。虎多
于六者。自乖其數。書殘武磴。頌論湯齊。烏寫混
淆。魚魯揉襍。增河南之邑爲雜。滅漢東之國爲

隋避上則罪不從辛。絕下則對因去口。棗合而棘氏微。足省而疎姓絕。定文于六穗之禾。訓同于導。分序于八寸之策。執異爲宗。丁尾亂真。鉤須失實。書六書肖。而旣謬國名。爲卷爲端。而遂乖服制。篆形誤僞。誰正雲興之祁。祁隸體散亡。共守鸞聲之鉞。鉞鎖定銀鑄之名。車改金根之目。知一束二縫之爲來。指二首六身之爲亥。郡章立信。救時惟正。于四羊。國史傳疑。考義共惑。于三豕。傳會作九。禾之秀。離析爲三。刀之州。合樂之奏。妄加文武之爲斌。定經之名。誤合日月之爲易。字失部居。改白水真人之兆。書忘形象。作非衣小兒之謠。四十八安。取于桑。三十七未。足語世。梁父七十二家。名雖俱在。尉律四十九。類書蓋已亡。誤存舟二間之爲航。安識門五日之爲閏。

人字具五形

人字左畫向上。陽也。右畫向下。陰也。水火木金。皆具此二畫者。蓋陰陽之義也。土則何以不爾。

以陰陽之義著于四物耳。故五行皆有土。而土于四物咸備焉。中央一直。非水之體乎。偏傍一點。非火之體乎。一直一橫。非木之體乎。全體所具。非金之體乎。禮曰：人者陰陽之交。五行之秀氣也。周子曰：五行一陰陽。以此。

无

周易無皆作无。王述曰：天屈西北爲无。蓋東南爲春夏。陽之伸也。故萬物敷榮。西北爲秋冬。陽之屈也。故萬物老死。老死則无矣。

聾字從龍

宋壽皇問王季海曰：聾字何以從龍耳。對曰：山海經云：龍聽以角。不以耳。

罰

罰古從刀。謂持刀詈人。元命包改以寸。寸法也。佩觿集

對

對古從口。漢文以言多非誠。乃去口從士。

佩觿集

疊

疊古從三日。揚雄言古理官。決罪三日得宜。新室以三日大盛。改三田。鄭樵曰。疊與豐同意。從宜。祭器也。從晶。象積肉之形。

智慧

雲笈七籤解智慧云。智者日中之星也。慧者宜以生生為急也。故慧字有兩生并而共乘一急之象。

心火

宋張有以小篆名世。嘗言心字篆文是一倒火

字耳。蓋心火也。不欲炎上。非從包也。春渚紀聞

水

莘少董妙于鼎篆。其論水字云。中間一豎。更不須曲。只是畫一坎卦耳。春渚紀聞

辰

天子以建辰月祭靈星。以求農耕。靈星。天田星。在于辰位。故農字從辰。鄭震讀書愚見

日百

日出。一上為旦。日入。一下為百。百。古昏字也。一

地也。曼衍

仁義

董仲舒云。以仁治人。以義治我。原甫云。仁字從人。義字從我。豈造文之意耶。鄰幾雜誌

賤

兩戈爭貝為賤。東谷所見

疾病

葉仲子一日論制字之妙。因及疾病二字。从丙从矢。蓋言丙燥矢急。燥急。疾病之所自起也。

病

參元朱子曰。病字从丙。丙火也。百病皆生于火。夫病字內丙固火。外二點从水。丙火盛而外水微。且相間隔。則病。水火既濟。自然無病。四季錄

地

地固以土言。張顯作古今訓。有地乃土。乙力之文。畛固以田論。埤蒼有畛則爾。有田之說。吳本郡國之號。本志有口在天上之語。酉本十二支之名。詩說有二在天下之論。中興書以舟在二

間爲舟。春秋說以人十四心爲德。尚書考異。王乘馬上。開元文字。子在母懷。

黍

說文引孔子之言甚多。如黍可爲酒。禾入于水也。又一貫三爲王。此類恐未必孔子之言。班固所謂宗師仲尼以重其言也。

正

正之字。二人立一上。一者地也。四方高。中央下。象形也。風俗通

同田分貝

陳后山云。金陵人喜解字。以同田爲富。分貝爲貧。讀書偶見

富自田起

古人殷潤家國。惟貴務農。故周人以稼穡艱難爲王業根本。秦人以力田受爵賞。漢人以力田應辟舉。觀古人制字。富從田。言富自田起也。田以一口。言有田之人。又貴食之者寡也。綠雪亭

隨

說文隨從也。从辵安步也。與惰音義不同。惰从
左从肉裂肉也。隨音旬爲切。惰音徒臥切。楊堅
本封于隨。後有天下。以周齊之間。犇走不寧。去
辵爲惰。其音則去隨從而就怠惰。其義則捨安
步而就裂肉也。豈非凶終之兆乎。後世因以隨
爲隨音。不思隨字从左月與墮音相近。卽俗砍
剝之剝也。

弔

弔。矢貫弓也。古者葬弃中野。禮貫弓而弔。以逐

鳥獸之害。

閃

人在門內。乃閃字也。人若夢之。主有不測之
事。將害于已。宜及早閃避也。或我欲尋人。而主他
人躲閃。無可踪跡。

革圭

鞋一破則去革存圭矣。圭命圭也。兆之士人當
執圭受皇恩。顯者登高位。覲天顏。庶民喜事至。
家業興吉。

女子

水邊女字爲汝。女與子字爲好。夢者事事佳美。吉昌之兆也。水邊相映。主好事多端。

火伴

今人呼人所聚爲一火。易火字爲夥。殊非本義。木蘭詞出門見火伴。火伴始驚惶。當作火。蓋火之爲物。聚之則明。散之則滅。或曰同炊爨。故曰一火。又唐制十人爲火。

止戈

潘黨曰。君盍築武軍而收晉尸。以爲京觀。臣聞克敵必視子孫。以無忘武功。楚子曰。非爾所知也。夫文止戈爲武。伯宗曰。天反時爲災。地反物爲妖。民反德爲亂。亂則灾妖生。故文反正爲乏。此後世拆字之始也。代醉

反正爲乏

左氏曰。反正爲乏。正無義也。正乃射侯之正。音征象其形焉。正以受矢。乏以藏矢。是相反也。反正爲乏。其義在此。或曰反正爲丐。音丐。蔽矢短牆。

也。正以受矢，巧以蔽矢，是相反也。此亦反正爲
乏之義。邪正之爲正，無所象，故正用侯正之正。
邪用琅邪之邪，並協音而借，是爲假借之書也。
六書略

郡縣

黃義仲十三州紀云：郡之爲言，君也。郡守專權，
君臣一體。又制字之義，君在其左，邑在其右。又
以邑者所以載民，合之爲郡。縣，立也。言當立靜
徭役也。又曰懸也。懸于郡矣。

犇麤

東坡問荆公曰：丞相摘微宥窮制作，某不敢知。
獨恐每每牽附，學者承風不勝其鑿。姑以犇麤
二字言之。牛體壯于鹿，鹿之行速于牛。今積三
爲字，而其義皆反之何也？公無以答。
程文

駟

宋文帝好忌諱，改駟字爲馬邊瓜，以駟字似禍
故也。本傳。

崇寧

崇寧錢上蔡京書。崇字自山字中一筆下。寧字去心。當時有有意破宋無心寧國之謠。貴耳集

波濤

馬守愚事

有江寧生者客潯。聞馬異往。看不告姓名。值案頭積書。指波濤二字曰。君能爲一測否。馬諦視久。忽詫曰。君佳士。何落節到此。夫水易爲坎。範爲潤。下陷不出。下不返。淫汙漂溺。都從此生。君無還年矣。非噬非剝。膚淪于澤。是維女子。媾男爲慙。夫不祥其孰章。氓之馮戎。壽爲大期。著田

成疇。著金成鑄。著人成儔。今也不然。井田爲川。鑄非其器。無人儔之。蕩蕩汨汨。靡所止期。循聲曰。逃巫臣竊妻子。意者其似之。生傲然曰。君亦知僕何姓乎。馬曰。象畫旣昭。羣鬼夜囂。吹律知姓。萬物同憂。云焉水區。壽誰其餘。按象而談。君非蔡仲之裔乎。江寧生廼前謝曰。神哉先生。僕少失父兄。好爲冶遊。畢燼其宮。攜歡而東。我雲彼龍。先生愍斯。維曷塗之從。馬曰。夫凝慮者不可惑以貌。知方者不可淆以蹈。玄冥失馭。后土

其莫之急之坤鄉。無與與謀。三壽作朋。西南得
之。擇里而安安。錢唐其可遷乎。其摘隱躡秘。皆
此類也。

字觸

卷之六終

字觸跋

沮誦制文道曰身跡

倉頡佐書義次象形

盈其度而日為君德

虧其傍而月為臣規

措筆之間已寓瘦鬼
於結體而寄諧韻於
綴墨矣舉一而言凡
百可觸故其行於世
者重之復之舉言而

必暢其旨其遠於用
者數之琢之一言而能
成其功字之時義大
矣哉觸類而長其一曰
瘦蓋兩軍相當繆

辭交遺二豪騁辨
隄語為酬自秦宮度
詞而范子折其情仲
尼求之而高弟憂其
隱此風一扇其言曼遂近

覆米離文殿手越絕藁
砧謎句肇自古者使
有智者乍悟而解願無
聊者湛鬼以擊其山頓
今福斯之撰遂為魁漫

之流則義已隸於俳諧
而詞亦歸乎巧笑多諧
者孩也諍不激而諧和
色釋莊而孩笑俳優
侍側破字獻嘲滑稽

在前析文排調運巧於
點畫剛捷於脣吻衛
武因而善諢風人所以
戲談者也樛園先生歲
著一書歲與身等讀

詞可繹
 洵義堪
 研陳
 稗史以什
 旣旃列
 莠
 以當臯
 翔游戲
 乎字
 林之苑
 借愛乎
 書勢之
 場廣
 摠瘦
 諧爰
 標字

觸豈其纖
 巧以弄
 魚蓋亦
 深長以字
 心何者
 深於度
 者可以神
 折
 揆之智
 可以明
 破敵之方
 深於
 諧者可以
 愧執
 迷之衷
 可以挫
 奸邪之
 氣而

在狎優閒御衝談笑能
 令強隣解甲能臣以封是
 去度者構象深徐而通天
 下之志諧者赴機捷遠而
 解天下之紛也管劉主以結

既忘憂謝傳以圍碁鎮
 物彼豈小物之玩而大猷
 之捐字觸一編寔同斯
 旨寧僅邯鄲笑林徒
 流漣浪藻世隱書無

益殿最也哉

順治六年歲次己丑暮

春治民莆田周嬰頓首

謹跋



字觸跋

麥麴鞠窮庾辭之祖也伏文見志
比擬耳柏者迫竇者豆漫語諧聲
何關機事禍福成敗率憑臆而得
之襲襲相承後世遂有專家之學
晰勾辨畫可以配宓義立體損文

可以當筭筵記曰人心之靈為之也天與人實相半矣櫟下先生無書不讀間亦好析字家言弘追隨二十年時當賓朋雜坐酒熱燈紅偶事緒踟躕群疑如漆隨拈一字擊射分塗理解神披俱成意義事

後惟先生中者十否亦十得五座客門生或十得三四或得一或盡不得莫不撫掌歡笑竊比神明居常舉其一二事以耀同人不謂字觸之書更儼然成帙也曰歎天下之事何常人生之理何盡鬣者安

字解
一
知其不為牛角者安知其不為馬
豎儒小生泥一隅之見膠方刺水
欲以盡天下之理盡天下之事豈
復能有當哉引而申之先生之言
小也請以喻大弟子黎士弘跋於

迴光禪院



程